

欽定剿平粵匪方略

欽定剿平粵匪方略卷二百十九 己未年

五月初一日

庚午

和春奏言據總兵毛三元安勇

等稟稱四月初九日逆衆擁至揚城四面攻撲
安勇督同副將馬國陞等會合在城文武連開
大礮轟斃前鋒悍賊數名逆隊漸卻我師出城
三路兜剿賊衆分竄灣頭十里甸等處意在東
犯毛三元帶兵扼堵萬福橋當派遊擊龐世清

等憑河守險賊不敢偏初十日張玉良馬德昭
先後抵揚諜知西路各鄉有賊焚掠其大股麴
聚陳家集在天長揚州之交距城各止數十里
當派副將馬國陞等各率馬步精銳兩翼包抄
張玉良會同安勇馬得昭等督軍隨後策應十
一日敗賊於廖家集十二日又敗賊於蔣王廟
殲殪約數百名十五日安勇督同副將鄧聯科

等攻其左馬德昭同遊擊白明玉等攻其右張
玉良居中押隊該逆糾衆迎拒鄧聯科等前後
兜抄將賊隊衝爲數股疊瘞黃衣賊目數名一
路跟蹤搜剿奪獲糧米羸馬等物無算共計斃
賊四五百名隨淮河臣庚長來咨探聞勝保官
兵堵剿失利逆氛闌入天長漸趨蔣壩已咨商
傅振邦撥兵堵禦並據探報該逆竄踞天長後

分股抄掠菱塘橋揚言卽日回竄淮揚各等語
查逆蹤飄忽靡常聲東擊西是其故智現在屯
踞高寶湖西與高郵止隔一水該處北連清淮
最關緊要聞勝保已駐紮盱眙天長之界必能
就近堵勦臣已飭張玉良等布置邵伯一帶防
其由天長陸路北竄仍令會督揚州文武扼險
紮營嚴防回犯奏入報

聞

同日勝保翁同書奏言粵逆大股屯踞天長漢
澗一帶臣因盱眙爲北竄要路昨已親赴穆店
蓮塘一帶就近調度凡東西北三面扼要處所
節節添兵杜其繞越並於舊鋪泥沛灣各營內
多備米糧火藥以資固守一面調令侍衛穆騰
阿總兵張得勝等會合馬步官兵進搗漢澗賊

巢連日出隊鏖戰該逆動輒出賊三四萬人我

兵每仗雖有斬擒究未能痛加剷洗而原紮汊

澗之副將成興都司黃誠忠川兵川勇兩營尙

在被圍情形仍屬危迫此股逆賊糾合東南兇

殘之衆悉踞於此竟似專注臣之一軍自非厚

集重兵不能制賊死命臣已疊催和春張國樑

等迅派援師馳救尙未接准回咨查江北營中

名將林立如張玉良熊天喜毛三元輩皆係久
經戰陣謀勇兼優應請

旨飭下和春等於此三員中揀派一人統師數千來皖
助剿俾臣就近調度得以合力圖功奏入

上命軍機大臣傳諭和春曰逆匪大股屯踞天長屢撲
官軍營盤勢極狹猖勝保駐紮盱眙兵力較單誠恐
不敷扼剿本日據和春等奏已撥兵赴江北擊退撲

揚州之賊並分兵保護邵伯一帶是江南赴援之兵
已在勝保前路著和春卽飭毛三元等一面嚴防該
逆回竄一面分兵馳往天長汊澗一帶會合勝保一
軍兩路夾擊速克堅城以固北路藩籬

初三日

壬申

勝保翁同書奏言查副將成興都司

黃誠忠川兵川勇兩營於四月二十二日夜分
突圍而出惟成興黃誠忠因督隊在後爲賊衝

散尙無下落其餘隊伍均撤至舊鋪歸入大營
屯紮二十四日賊由汭澗突出二三萬人北撲
舊鋪張公鋪各營並分股直撲大雩山經營總
薩薩布烏勒興阿等迎頭截殺鏖戰三時將賊
陣截爲數段賊匪紛紛敗走擊斃無算另股向
東路竄撲又經馬步各隊截殺追至汭澗橋北
殲瘞五六百名落河淹斃約千餘名生擒一百

餘名其天長之賊同時竄至楊村一帶營總西
蒙額等帶隊迎擊立斃悍賊百餘名餘賊遁回
西路半塔集等處賊匪依山結陣營總得春等
率領馬隊由斧山一路迎截該逆抵死不退張
得勝伏兵由大雩山一路繞出賊後會合夾擊
槍箭齊施逆衆大敗狂奔追殺二十餘里落河
死者又數百名餘衆逃遁回巢現已嚴飭穆騰

阿張得勝等乘機卽行進勦以期痛殲醜類早
復堅城

勝保翁同書又奏言四月二十五日穆麟阿張
得勝等督率馬步各軍馳抵汧澗該逆負嵎死
守我兵先用大礮轟開賊柵繼以火箭噴筒連
環射入匪衆出巢抗拒兵勇馬步並進更番鏖
戰斃匪六七百名逆勢不支我兵直前奮擊匪

衆遁逃各軍一齊掩殺斬關而入立將賊壘二十餘座一律踏平其東王廟一股亦經營總西蒙額等分帶官兵盡力擊殺斃賊極多計各路擒斬逆衆不下三四千名奪獲槍礮器械旗幟六百餘件羸馬一百餘匹現在天長之賊勢成孤注已密派副將格洪額營總得春等帶領馬步官兵乘勢直逼天長冀可早復堅城出力將

弁容俟攻克天長後再當擇尤保奏

勝保翁同書又奏言再臣前摺請調之鎮將除
毛三元病不能戰外其張玉良熊天喜二人恐
皆防剿喫緊未能前來現在皖省當北犯之衝
地勢寬廣防不勝防惟有再懇

天恩俯念

臣

營關繫北路大局催令樂善迅帶馬隊一

千名兼程前赴盱眙
臣稍資臂助抑臣更有

請者賊勢旦夕變遷遠處徵兵仍恐緩不濟急
查江南現在情形稍緩總兵周天培謀勇兼全
亦張國樑張玉良之亞可否仰邀

特旨飭下和春迅飭該鎮帶兵數千名由高郵渡湖迅
速來營歸臣調度以期稍厚兵力奏入

上命軍機大臣傳諭勝保曰周天培現在駐兵浦口正
資攻剿若令繞赴盱眙又須另派大員前往浦口未

免多一轉折所有江北各軍俱係和春派出如張玉良帶兵一千赴揚擊退撲城之賊熊天喜帶兵四千渡江海全又帶馬隊赴揚本日諭和春卽於各軍內酌派或令揚州兵與勝保夾攻天長更另撥兵繞至勝保軍營會剿矣勝保已破汊澗諒天長一邑不難克復至李世忠潰兵業已收集諒亦可加之驅策所需馬隊昨已諭僧格林沁撥黑龍江兵一千名交傅

振邦與勝保各半分用此項馬隊俟克復天長後可
隨往皖北以資攻勦

上又命軍機大臣傳諭和春曰勝保等奏請飭和春令
周天培帶兵數千前往盱眙張玉良前帶兵赴揚州擊
恐未能舍浦口而就盱眙張玉良前帶兵赴揚州擊
退竄撲之匪熊天喜又帶兵四千渡江又有海全帶
馬隊四五百名由儀徵馳往揚州一帶助勦均係和

春派出之兵著卽在各軍內酌量調撥前往勝保軍營會剿天長賊匪以期速克城池揚州與天長毗連若由揚州進兵攻其南再撥兵繞至盱眙會同勝保攻其北更爲得力著該大臣相度機宜妥爲籌辦

上諭內閣曰官軍截剿天長汭澗賊匪回巢並攻克汭澗賊壘疊獲大勝勦辦尙屬得手仍著勝保等督軍迅克天長縣城毋稍延緩所有此次出力員弁著俟

攻克天長後由勝保擇尤保奏

初七日

丙子

勞崇光奏言查江西大股逆匪竄至

湖南實較他股爲多入楚後隨處裏脅又復不
少今竄至全州蔓延數十里經署潯州府知府
蘇鳳文等督率兵勇團練截殺實已不遺餘力
而人力太單寡不敵衆臣由省陸續派往壯勇
二千數百人較之賊數不及十分之一全州爲

粵西門戶若不將該匪掃蕩事更掣肘不得不
爲移緩就急之計現蔣益澧在柳州勦賊因尙
須添置水師船礮未能剋日竣事與其株守以
待不若先其所急速顧全州臣已飭酌留兵勇
在柳州扼要防勦其餘湘勇卽日管帶回省馳
赴全州勦辦務將該匪殲除淨盡庶可疏通道
路綏靖地方團總生員賓賢介帶團防堵打仗

陣亡殊堪憫惻相應仰懇

大恩飭部從優議卹以慰忠魂奏入得

旨賓賢介著交部從優議卹

十三日 壬午 和春奏言四月二十七日逆賊由天

長分股下竄三路長驅在東北靈巖山入埽橋

陳家橋等處屯聚並分踞儀徵江干之東溝一

帶圖撲紅山窰甚急提督瀚殿華等聞報卽派

遊擊詹啟綸帶兵三千六百餘名馳往紅山窰
先爲之備二十八日靈巖山逆股突至詹啟綸
首先迎敵殲斃數十名其勢稍卻忽有騎賊數
千直趨副將鄧鳳林新營鞠殿華等督同將弁
兵勇三路抄擊槍殪騎馬悍賊二名餘始潰退
五月初二日瞭見東溝之賊攜帶木石板片潛
造浮橋鞠殿華等當卽會同詹啟綸直擣東溝

手刃騎馬賊首一名大兵乘勢追擊生擒僞師
帥郭再廷等九名訊明梟示餘賊遁回東溝仍
由八埠橋一帶三面聯營分我兵力查紅山窰
距六合二十餘里緊接東溝旁通瓜埠係大營
餉道咽喉該處雖有層啟綸一軍尙恐賊衆兵
單不敷扼堵刻下賊勢趨重六合揚州情形較
鬆當飭前由金陵派赴揚州之副將朱承先管

帶所部兵勇二千名剋日馳赴六合扼紫堦勦
並檄水師總兵周希濂管駕艇船駛泊泗源溝
江面以免該逆乘虛南竄一面函囑張玉良等
挑派馬步各軍由儀徵相機進兵以搗東溝之
後遙爲六合聲援奏入報

十八日

丁亥

勝保翁同書奏言天長逆賊自四月

二十七及五月初三等日經我軍連次進攻皆有斬擒初九日各軍由護城橋分路齊進直薄城闔該逆由北門出撲我軍奮力迎殺逆衆又由東門突出二千餘人總兵張得勝副將格洪額帶隊奮擊斬殺多名賊勢敗退我軍隨殺隨進追至城根收隊該逆復傾巢而出我軍誘至隄前伏兵齊起施放連環槍箭該逆負創回奔

聞

我軍從後掩殺擊斃淹斃者不計其數餘逆鼠竄入城堅伏不出城上槍礮矢石守禦加嚴我兵暫撤歸營再圖進取奏入報

二十一日

庚寅

官文奏言湖南軍事自永郡解圍

祁陽大捷後兵威益振而逆賊分股竄擾郴州桂陽新田東安甯遠道州江華武岡等屬爲數

實繁雖經地方文武隨同帶兵各員先後截擊
斬馘亦衆而賊蹤忽東忽西漸滅漸起四月十
一十九等日祁陽敗匪麕聚寶慶城外之七架
坡等處勢甚狃獍武岡戒嚴經副將田興恕督
勇迎擊獲勝仍於城外駐軍以扼其衝駱秉章
又調總兵周寬世副將朱品文遊擊劉吉三卽
選道趙煥聯王勳等各軍分路截勦並飭新甯

武岡郴宜衡永派駐各軍擇隘防勦搜捕匪黨
布置尙臻周密臣前以南省兵力未厚調派北
省各軍馳往援勦後又派赴南募勇之已革總
兵李續燾趙克彰等前往昨准駱秉章咨商已
留爲衡寶防勦以益兵力臣審度該逆分擾楚
邊牽我兵力其志不得衡州必圖寶郡爲下窺
湘鄂之計而衡寶無由逞志必將竄擾蜀中常

德辰沅永順均爲喫緊曩獲奸細供稱均屬相符現在固我全楚當於衡寶二郡加意防勦並山川蜀堵其竄路無難悉數殲旃

官文又奏言查逆首石達開自竄湖南以來蔓延千數百里脅衆十餘萬以巨股萃於祁陽與我軍相拒近更分竄邵陽新化武岡等州縣連獲賊謀俱言石逆蓄謀已久必欲逞志於四川

今既悉窺湖南西北一路去蜀更近道路紛歧
防不勝防若由資江沅江城船遞窺常澧則洞
庭之險必失而湖北之荆宜兩郡俱危此爲入
蜀正路若由辰沅遠走秀山西陽或由黔中假
道入蜀則必先踞岷江夔關三峽之險現在湖
北水陸之師全力注於皖省如再分撥僅可近
防洞庭常澧勢不能再顧西路僞賊窺越則兩

省追兵俱在其後適以速其入蜀之計聞蜀中
西陽等處已設防兵惟賊數號稱數十萬蜀中
承平日久額兵多半調撥他省猝欲禦此強寇
深恐力不能支查蜀中財賦之區中外皆資其
力若賊得肆志入蜀其鷓張必數倍於湖南不
特貽患於兩楚防無虛日並恐西出關中爲秦
晉之大害臣伏思保邦之要求將爲先竊見侍

郎曾國藩忠勇篤摯賢士歸懷奉

旨行軍八年識拔之士如塔齊布羅澤南李續賓等皆
忠誠奮發臨難不避設令移軍至蜀必可有爲
刻下蜀事至緊欲保蜀應先據岷江爲要著必
藉水師礮船方能得力蜀中素未講求及此臣
不揣愚昧伏求

飭令曾國藩酌帶江西湖北湖南四川水陸精銳將士

由楚江駛入蜀中責以守蜀之任蜀中智勇之士必且望風景附壁壘一新若能出賊之前扼住險隘湖南追兵在後定成夾擊之勢此賊必可聚而殲旃至江西景德鎮之賊不過萬餘或

請

飭李定太守饒州饒廷選守撫州彭玉麟守九江自能保固疆圉俟南省肅清蜀事果定則楚軍得以

專意東征卽江西餘孽亦不難殄滅矣奏入

上命軍機大臣傳諭曾國藩曰官文奏探知湖南賊衆勢將入蜀請飭曾國藩帶兵迅赴夔州實爲通籌大局起見本日已諭令有鳳派兵扼要嚴防惟該省兵力恐不能當此悍賊曾國藩前派蕭啟江帶兵援勦湖南現在湖南喫重此一軍自未能調回此外如江西湖北湖南四川等兵均素稱得力著曾國藩卽日

統帶由楚江前赴四川夔州扼守以據兩湖上游之
勢儲賊蹤竄至卽可有備無患至江西景德鎮之賊
尙未勦平據官文奏請飭李定太守饒州饒廷選守
撫州彭玉麟守九江著曾國藩斟酌情形咨商耆齡
妥爲布置俾得迅掃賊氛不至顧此失彼

上又命軍機大臣傳諭有鳳曰官文奏逆首石達開久
欲逞志於蜀襄魯郴桂衡永山民甚衆湖南西北一

路毗連蜀境道路紛歧若由資江沅江擄船窺伺常
澧係爲入蜀正路或由辰沅遽走秀山西陽或由黔
中假道恐先踞岷江夔關三峽之險雖西陽等處已
設防兵而賊數號稱數十萬深慮力不能支並以保
蜀應先據岷江必藉水師礮船方能得力請飭曾國
藩督師由楚江到夔所籌不爲無見本日已諭曾國
藩親率所部赴蜀惟曾國藩兵勇分勦各路能否卽

到四川尚難豫定所有夔州正路宜先未雨綢繆至
酉秀一帶亦須添撥重兵以資守禦現在王慶雲計
已卸篆赴粵有鳳兼署總督責無旁貸著卽趕緊布
置扼守險要並隨時偵探何路喫緊卽撥重兵前往
以臻嚴密不得專待曾國藩客兵致有貽誤

同日勝保奏言查蔣壩盱眙均爲北通清淮門
戶陳玉城兩次由天長竄出北擾其垂涎清淮

已久今進攻天長兵力不厚儻賊衆傾巢大舉
直向北犯關繫甚爲緊要擬請

旨飭撥精兵數千名於清淮一帶駐紮專防東北一面
遇有緩急仍應歸臣調遣庶可會合一氣有備
無患奏入

上命軍機大臣傳諭和春曰現在勝保旣未能攻克天
長不得不扼守盱眙防賊北竄蔣壩防兵甚單清淮

亦屬可危必得江南撥兵迅速會克天長庶可杜賊
北竄此時江南北各軍統歸和春節制著該大臣仍
遵前旨迅撥江北精兵前往天長會同勝保將該城
剋期收復則清淮亦可無警而賊衆不得乘虛北竄
矣

二十二日

辛卯

張芾奏言建德逆匪糾衆竄偏下

隅阪意圖北犯防守各軍接戰失利賊衆復撲

牯牛嶺總兵普承堯知嶺隘已失恐賊將悉衆
而西實妨大局遂招集潰卒悉撤各營退保彭
澤門戶其浮梁羣賊或竄鯉魚橋窺伺婺源或
掠何家墩覬覦祁門萬一賊更猖獗肆力竄突
不特徽州轄境可虞卽江西九饒兩府亦恐從
此蔓延勦辦尤形棘手合無懇

恩飭下湖北江西督撫速撥勁旅分駐東流湖口彭澤

之間俾普承堯後顧無憂庶足力遏賊氛奏入

上命軍機大臣傳諭耆齡曰張芾奏江西官軍與建德

逆眾接仗失利退守彭澤請飭催江楚援兵會勦現在皖南既無軍可調而湖北各軍又因協勦湖南賊匪撥兵四出勢難兼顧江西自應急籌接勦以固本省門戶耆齡迅卽抽撥勁旅派委得力將備管帶分駐東流湖口彭澤之間爲普承堯後路聲援以資

攻勦

二十四日

癸巳

略秉章奏言逆首石達開分股出

沒於永屬之甯遠道州一帶散竄江華永明及
廣西灌陽全州邊界冀以牽掣官軍而其注意
則在永屬之祁陽東安兩縣臬司劉長佑道員
江忠義等於三月十二日在永州續獲大勝後
忽另股賊匪圍撲東安縣城四月二十二日用

地雷轟陷署知縣李右文等均力戰遇害二十
八日賊撲新甯城北之摩訶嶺都司徐良瑛等
與江忠義內外夾擊斃悍賊百餘賊卽卻退散
踞村莊江忠淑等潛赴村後縱火賊驚呼竄遁
自相戕殺江忠義等追勦斃賊七八百名落澗
死者無數救出被擄難民四百餘口城圍頓解
三十日夜賊由東安棄城逃走另股撲寶慶武

阿劉長佑等急起追之四月初三日行抵藍廟
賊卽竄走副將李明惠等合勢衝殺立斃悍賊
數百人生擒僞將軍僞地道總制及僞官十七
名正法奪獲槍礮器械無算賊敗後邀洋田股
匪會撲官營初五日戰於木山賊三萬餘偏攻
營壘山谷皆滿劉長佑以八成隊出擊自辰至
申鏖戰數時賊衆死傷相繼猶更番壘進不休

劉長佑令留營各勇均出隊衝殺賊卽乘虛撲
營官軍力不能支奪路突走營壘盡失賊旣敗
劉長佑之軍知南路無官軍追勦遂併力以窺
寶郡初八初九等日賊已擾及郡城南之黃塘
經副將田興恕率遊擊田興奇等縱擊斃賊數
百名十四日賊傾巢復至田興恕等截擊於七
架坡後各營繼進追殺二十餘里計斃賊一千

五百餘名生擒十一名奪獲馬三十餘匹槍械
三百餘件十八日賊由崑山竄撲武岡州江忠
義會同署知州汪敷灝等固守斃賊多名奪木
梯二百餘架二十三日劉長佑等軍內外夾擊
賊遂驚潰自相踐踏及溺斃者甚多由東北竄
遁城圍立解維時身股分撲道州甯遠均經官
紳擊退賊復繞全州界以入新甯劉長佑等擊

之崑山殺賊五六百名生擒五十名其另股又竄至大飄坪劉長佑令劉坤一等七道並進賊陣大亂連斃一千四百名割首級七百六十顆生擒賊一百九十五名奪獲槍械贏馬旗幟共七百餘件二十六日賊由大飄坪竄出官軍截殺斃賊千餘割取首級七百五十顆生擒偽侍衛夏元有等三百餘名救出難民六百餘口

奪獲旗幟擡槍七百餘件其新寨村之賊總劉長佑令各營排開槍礮賊眾驚擾夜半遁去官軍追至龍潭溺斃之賊無數復追過五里圳計斃賊數千二十九日劉坤一等分剿新寨山塘之賊斬獲甚多合計斃賊一千二三百名查石逆分股繞由粵西陷東安連撲新甯縣武岡州官軍兩保危城數獲大勝惟劉長佑一軍自東

安急援寶慶營壘全失咎無可辭姑念該員自
回軍新甯後未及半月卽五獲大捷斃賊萬餘
功過尙可相抵可否免其置議出自

天恩其在事出力之文武員弁及陣亡官兵應請
飭部分別獎卹奏八

上諭內閣曰駱秉章奏逆匪竄擾湖南各屬均經官軍
擊剿屢獲大勝現在賊勢已極窮蹙著駱秉章督飭

諸軍分路搜捕毋留餘孽所有在事出力之卽選道
江忠義著賞給伊祖父兩代四品封典副將田興恕
前經記名以貴州總兵用此次勦辦出力著賞加提
督銜候補按察使劉長佑先在木山失利自回軍新
甯後未及半月五獲大捷功過尙足相抵著加恩免
其置議知州銜署東安縣事准補邵陽縣知縣李右
文守城遇害情殊可憫著照同知例從優議卹其餘

陣亡各員弁均著照例議卹

駱秉章又奏言當逆首石達開陷桂陽嘉禾時已料其必竄永祁以取上游之勢維時衡州當兩路之衝徵兵未集故飭劉長佑余星元楊恆升分道赴衡並令中途遇賊卽擊石逆狡詐殊常此次賊目多係鹽販煙販會匪各府縣山僻小徑皆其熟遊故賊蹤出沒多出意計之外自

永祁大捷後奸謀已阻石逆旣至祁陽令各股悍賊馳騁於楚粵之交勾結兩廣各股土匪悉數竄入湖南會合其竄灌陽攻全州者均於楚粵交界計誘官軍躡蹤追剿以便其深入之謀且招致粵匪以張其紛紜之勢逆賊亦曾揚言回粵西老巢其實非勢極窮蹙必不舍楚竄粵粵西屢經兵燹粵東偏近夷氛非賊所注意也

現在大股均聚寶慶繞竄粵西邊界陳賴各首
逆俱帶粵賊趨寶上年由福建竄去廣東之僞
國宗陷嘉應州後又繞由仁化縣入楚晝夜急
行已抵甯遠縣攻撲城池衆約二萬而英德巨
匪號稱二十萬者已竄乳源勢亦駭駭入楚臣
已調卽選道蕭啟江副將李輔朝知府陳士杰
同知銜魏喻義各帶所部駐營柳州及宜章臨

武邊界扼要嚴防

駱秉章又奏言大股逆賊均竄寶慶南路蔓延
東路西路且有漸偏北路之勢臣所謂各路勇
丁除郴宜臨武一路外盡派赴寶慶營頭太多
必須遴員統領以專責成寶郡地居腹中路徑
四通八達應分派統領兩員一勦東路一勦西
路偏賊歸併南路然後合勢擊之方可杜其紛

竄寶西一路當責之劉長佑而以田興恕副之
寶東一路實難其人間按察使銜候選道李續
宜有告假暫歸之信臣擬俟其到籍卽派充寶
東一路統領以一事權李續宜現在鄂中統帶
各營亦難久羈湘省特湘中軍務此時較鄂爲
急實非李續宜暫時統領不能收功已函商督
臣及湖北撫臣飭令李續宜暫統寶東軍務如

鄂省有警一檄馳來卽當趕赴鄂中聽候調遣
奏八

上命軍機大臣傳諭略秉章曰昨據官文奏稱探聞石
逆圖竄四川蓄謀已久或由資江沅江以窺常澧掠
荆宜或由辰沅徑趨酉秀均應亟籌堵禦當已諭令
有鳳於夔巫及秀山西陽等處派撥重兵嚴密設防
並諭令曾國藩卽統所部精銳由楚江直赴夔州妥

籌防範矣逆賊竄擾數省所至糜爛若再令擾及蜀中不獨財賦之區悉遭蹂躪且勢踞湖北上游荆襄等處皆爲震動卽陝西亦須設防大局將不可問著駱秉章悉心籌畫務於辰沅常澧等處調派重兵嚴行扼截以杜賊衆西竄蜀川之路仍一面督飭弁兵分投攻勦將匪黨次第殲除不可稍涉疏忽駱秉章奏道員李續宜卽可到籍擬令統帶寶東兵勇著照

所請辦理

欽定剿平粵匪方略卷二百二十 己未年

六月初一日 己亥 和春奏言查該逆自六合東北

直抵東溝江千百里聯營屢敗不散總欲斷我
餉源必先將東路掃清使轉餉無虞進攻方有
把握五月初八日候補提督鞠殿華飭副將朱
承先等率馬步兵勇直搗東溝王子廟地方自
率副將英貴等三路進兵當將東南王子廟東

溝太平集數十里之內一律蕩平餉路無阻十
五日鞠殿華熊天喜分軍進攻東溝池北靈巖
山一帶之賊黎明俱抵山下直偪賊壘連拋火
筒火彈賊營鼎沸踰垣墮水之賊無算各軍追
至新篁巷將賊館悉數掃除統計二十餘里內
賊巢大小四十餘處全行鏟淨六合東路漸次
廓清十七日正擬進攻北城賊巢忽報紅窰之

西有賊繞近瓜埠欲絕我水軍餉道且與六合南門相近城內之賊可以聯絡使我腹背受敵遂派詹啟綸等分軍馳至瓜埠奮力衝擊殲賊甚多維時鞠殿華督軍分攻南門副將王萬清手刃黃衣賊目一名餘賊遁匿熊天喜仍督英貴等分攻城北賊巢賊出大隊萬餘騎賊尤多我軍直搗中堅繼以兩翼包抄斬獲無數先是

防守揚城之總兵安勇張玉良等聞賊由天長
竄回六合張玉良卽於初七日親督副將馬德
昭等安勇親督副將王巨孝等各率馬步兵勇
馳赴儀徵截賊於西北門外之沙河大小銅山
而以副將馬國陞等爲中路策應斬馘不少焚
其哨棚三座賊卡二座仍督軍回駐揚城現探
得天長逆黨分股回犯六合以後勝保由盱眙

派兵勦洗較爲得力兼以庚長派兵嚴扼蔣壩
安勇張玉良等又由揚城兼顧邵伯鎮高郵一
帶北路似覺較鬆前奉

諭旨因天長賊匪衆多飭臣令周天培帶兵前往盱眙
會同勝保進剿臣現飭安勇張玉良等刻刻哨
探不得因天長賊勢已分稍涉大意如有警報
卽由揚城帶兵或赴天長或赴盱眙相機會剿

惟六合賊雖屢創餘黨尙有數萬分踞北路及浦六交界必須淨翦諸逆始可專力孤城該處爲南北咽喉自張國樑督兵搃紮以來賊糧漸斷接濟而南岸各營以及高淳等處防軍多往江浦六合一帶卽統兵鎮將存營亦無幾人實屬過形空虛茲已將總兵馮子材副將朱承先均由六合先後調回並兵勇三千名仍歸原營

分紮以備緩急奏八

上命軍機大臣傳諭和春曰前因勝保進攻天長兵單未能卽克當諭令和春仍遵前旨迅撥江北精兵前往會同勝保將該城剋期收復茲據和春奏稱探得天長逆黨分股回犯六合以後北路較鬆並未於張玉良各軍內酌量調撥前往會剿現在天長賊勢雖分勝保扼守盱眙尙未能攻克天長著該大臣仍遵

前旨酌撥江北精兵前往相機會勦速拔堅城杜賊
北竄以固清淮門戶勝保亦得分兵進勦懷遠等處
賊匪不致爲此股逆匪牽掣該大臣勿得輕聽將士
之言稍分畛域至將來克復天長以後此項官兵應
仍調回江北毋庸留勝保軍營調遣

初二日庚子官文胡林翼奏言逆首石達開裹脅

安徽江西浙閩兩粵之賊竄擾湖南號稱數十

萬欲由寶慶常德荆宜各路擄掠入川自應併
兩楚之力先除西南之患庶可專力東征先經
臣等調撥馬隊二百名陸軍一千五百餘員名
並派總兵王明山等水師四營礮船一百餘號
往援湖南近因賊匪聚集寶慶該郡爲江湖緊
要關鍵又續調安慶水師礮船九十餘號分援
常德辰州及臨資口一帶以重沅資之防兼飭

遊擊左光培水師礮船二十八號及已革總兵李續燾勇五百名馳往荊州虎渡口以重澧州之防猶恐陸路兵力較單再飭道員李續宜揀選撫湘各軍五千三百七十餘員名並餘丁長夫四千名從湖南益陽安化一路前往寶慶兼可以備常澧一路之警准駱秉章函商以南省將士雖多事權不一而新募各軍半係李續賓

舊部擬請將道員李續宜派往寶慶暫行統領
各軍以期大局有裨等情與臣等意見相合當
卽飛檄李續宜遵照辦理惟是湖北一省馬步
水師各營旣以全力規畫皖江南北更復西顧
荊州北防尙固茲以湖南異常緊急復勉力抽
調重兵以全大局並非鄂力之果能有餘也統
計派援湖南之水師陸營馬隊每月餉銀五萬

兩以外均由臣等札飭湖北糧臺解送毋庸湖南籌備並飛催山陝四川將月餉迅速解楚亦可先助湘南之不足其水陸戰事應歸略秉章就近奏報惟軍情變幻如有應行酌量改調之處仍由臣等專札調遣奏入報

聞

官文又奏言臣查馬軍口糧倍於陸軍而馬兵

一可當陸軍之十至緩急相需馬隊尤能迅速
應手所謂

國家之勁旅無敵於天下者也湖北之兵力稍強
者礮船馬隊功居六七礮船陸勇可以隨時添
募惟本地馬隊終不得力且皖省南北道路分
歧賊蹤徧野非分三四路進兵恐孤軍深入易
被包抄前此雖調有黑龍江西丹千名尙恐不

數分派伏求

逾格恩施俯念軍情緊要再酌添西丹馬隊五七百名
來楚以壯軍威而收實用較之添調陸軍倍加
得力奏入

上命軍機大臣傳諭官文曰皖省賊蹤徧野非分三四
路進兵則孤軍深入堪虞前請撥黑龍江西丹祇有
千名尙恐不敷分派自應添益馬隊以圖進取惟現

在天津尙未撤防馬隊未能調撥著官文就現有兵力先爲布置儘巴揚阿所帶黑龍江西丹一千名到楚卽可令其赴皖勦辦俟天津撤防再行飭撥馬隊前往以資攻勦

初三日

辛丑

勝保翁同書奏言前因賊踞天長壘

飭副都統穆騰阿督兵進紮石梁護城橋節節偪攻另撥馬隊官兵續至天長西南東王廟馬

家集一帶進勦第恐該逆悉銳北犯臣軍數千
兵力斷不能制是以奏請

飭令和春撥兵援勦乃昨准和春覆稱首逆四眼狗糾
集匪衆十數萬在六合以北天長以南之八埠
橋一帶屯踞肆擾官軍餉道甚關緊要不能撥
兵赴援皖北臣再四思維殊深焦急正在竭力
籌辦間適聞定遠南路喫重又復先後抽撥麟

瑞等馬隊四百餘名前往援應以顧西路詎陳
逆窺知我兵單薄遽率大股由馬家集等處繞
攻天長各軍之後副將李世忠等因賊勢過重
退保滁來並竹鎮之賊亦由馬家集一帶悉數
出竄臣聞報後卽飭石梁護城橋各營極力固
守營盤該逆於五月二十三日分股來撲經我
軍奮力擊退賊復由舊鋪一路直撲盱眙臣飛

調穆騰阿等馬隊繞赴舊鋪以北迎頭截擊臣
親督各兵往勦而隨臣駐盱之軍僅四五百名
合之馬隊官兵數不滿千與該逆相持數時之
久幸將逆衆暫行擊回舊鋪而大股狂氛勢不
可遏臣已飛檄麟瑞等如果定遠情形稍鬆卽
將派出原隊星馳回援查舊鋪距盱眙不過五
六十里該縣本無城垣又無險隘賊勢如彼兵

力如此設再添賊分路北趨實有寡不敵衆之勢奏入

上命軍機大臣傳諭勝保翁同書曰前因天長未復賊燄甚熾疊經諭令和春於張玉良等所統各軍內派撥數千名前往會同勝保攻剿現在大股逆匪由馬家集等處竄撲天長各軍之後勝保兵力過單難於抵禦所有張玉良等兵勇現俱駐紮揚州六合等處

著勝保飛咨和春催提弁兵三四千人馳赴天長會
同攻勦儘盱眙需兵卽提此項官兵自北向南堵剿
更爲得勢惟江南北地方甚廣需兵設多前因和春
未卽撥兵赴援天長業經諭令侯克復天長後仍將
所撥之兵回至江南北軍營歸和春調度勝保不得
截留致滋貽誤至定遠南路喫緊勝保已派馬隊援
應仍著翁同書督飭弁兵實力堵扼毋稍疏懈其黑

龍江馬隊並著該大臣等催提以資助剿

初四日

壬寅

耆齡奏言四月二十二日道員劉于

瀉派各營陸勇分路進攻里市渡中渡十八渡
自督礮船繼進該逆於中渡河心築水城一座
堵我水師進攻之路二十三日劉于瀉督率戰
船攻破水城守城之賊均投水溺斃時遊擊任
星元亦率礮船駛至協力進攻十八渡劉于瀉

揮令各船駛入內港擊斃老鴉灘守卡賊匪多人次日又飭令各營陸隊渡過西瓜洲直攻中路大股賊匪出拒我軍水陸夾擊賊匪大敗殲斃百餘人立將十八渡礮臺焚燬二十五六等日陸勇復渡洲攻勦並設伏於洲前叢葦中殪賊無算二十七日進攻裏村等處當將賊卡二座攻破二十八九兩日屢經劉于瀆會合水陸

聞

齊攻西瓜洲等處賊卡斃賊尤多此次水陸各營會攻鎮賊大挫兇鋒惟因賊壘甚堅未能遽拔現准曾國藩咨會已令卽選知府曾國荃率湘勇六千名赴鎮助勦得此大隊勁旅合力會攻當可掃穴擒渠奏入報

初六日

甲辰

勝保奏言查盱眙空虛過甚亟須添

兵援應而總兵張得勝進攻天長一軍被賊牽掣未能撤回惟副將格洪額及都司馬振瀛所帶兵勇尙有二千餘名卽飭在東南之洪子橋十里鋪一帶分投扼截其四十里橋一路係赴盱眙要道情形最重因派陳得魁督帶兵勇前往迎截五月二十五日賊衆萬餘撲近四十里橋臣因無兵可撥祇得將盱眙存營兵勇四百

餘名全行帶往行至古桑樹地方爲賊所圍臣
力與相持適營總郭興阿等帶隊趕到始解臣
圍穆騰阿與格洪額等迎戰十八里橋一股亦
有斬擒而南路大股匪衆仍紮四十里橋附近
一帶二十六日賊又分三股撲出數倍於前臣
卽率穆騰阿等列隊山嶺分路迎擊斃賊數百
名首逆四眼狗復率一二萬人由後路踵至接

應經我兵直前掩殺賊勢稍卻忽見南路火光
燭天探知舊鋪一帶之賊全行撲出洪子橋營
盤危急一面飛飭署知縣許垣卽帶水陸練勇
三百餘名防守縣中暫顧後路臣帶步隊三百
餘名及穆騰阿馬隊三百餘名馳援洪子橋一
路該逆正在前路指揮各軍竭力支持不料又
分股徑撲野貽該縣旣無城池署令許垣帶勇

堵擊旋因眾寡不敵致被逆匪倉猝闖入臣督
勦無方實難辭咎應請

旨將臣

交部嚴加議處此時軍情既變權度輕重自以
力遏北竄先保清淮爲要著蔣壩本屬皖境更
爲東北緊要門戶設使再有疏失大局所關愈
重臣惟有督軍嚴密堵勦一面調張得勝格洪
額及穆騰阿所帶各兵分布南岸三河一帶以

固蔣壩前路兼杜天長竄逸之匪其北岸之太平集雙溝一帶已咨明傅振邦派兵堵禦並飭沿湖州縣將船隻收歸北岸免致逆衆偷渡仍將一切堵禦機宜隨時咨商庚長以臻周密至西南定遠情形亦甚喫重但目下西趨定邑之路已爲賊所隔絕其麟瑞薩薩布原帶馬隊三百餘名並得春善慶馬隊二百餘名自應歸臣

翁同書就近調遣一俟此閒賊情稍定道路可
通應如何分撥西援之處臣仍必統籌全局互
相策應不敢顧此遺彼

勝保又奏言皖省軍務地廣賊衆非得勁旅數
萬不能痛挫賊鋒臣先後請

飭撥江楚各軍應援皆未能如願以償逮該逆侵入天
長臣窺其比犯之志已萌復請

迅撥天津馬隊赴皖助剿荷蒙

天恩飭撥一千名令與傅振邦分撥應用此項官兵計

期當可到來今事機漸形急迫臣斷不敢以兵

單爲詞然賊勢如此猖獗總須兵力足敷布置

方爲有備無患抑臣營帶領馬隊尙多得力之

員而帶領步隊鎮將中除總兵張得勝慶瑞副

將格洪額外殊乏其人臣以一身馳驅行陣實

難兼顧可否一併

飭派得力鎮將大員一二人馳赴臣營俾資指助實於
軍務有裨奏入

上命軍機大臣傳諭勝保曰蔣壩爲東北緊要門戶該
大臣擬嚴扼此處以固清淮並分飭濱臨洪湖各州
縣收絕船隻以防偷渡所辦似尙足恃日內江南援
兵計可前來茲復寄諭和春令其仍遵前旨派兵前

進與勝保會同勦擊著卽迅速迎提相機堵剿克復
盱眙天長力扼北竄是爲至要另片請派帶領步隊
得力鎮將馳往軍營勝保前請調之樂善現因辦天
津防堵已補授直隸提督未能令其遠赴皖省已飭
令和春選派提鎮大員矣

上又命軍機大臣傳諭和春曰據勝保奏天長賊勢披
猖竄撲盱眙兵力不支致被攻陷勝保已退紮蔣壩

力扼北犯清江之路現在天長未復盱眙又失勝保一軍竭力支持深恐賊衆兵單設有疏虞於大局頗有妨礙著和春仍遵前旨卽在張玉良等各軍內迅撥精銳數千名並選派帶步隊之捷鎮大員管帶馳赴北路會同勝保合力進剿克復盱眙天長二縣以固清淮門戶不得稍有遲延致滋貽誤

上諭內閣曰逆匪於五月二十六日闖入安徽盱眙縣

內勝保雖屬疏於防範究因賊衆兵單所致勝保著
加恩改爲交部議處仍督率將弁迅圖克復以贖前
愆

初九日

丁未

會國藩奏言三月二十日張運蘭等

督率各營攻入下李村擊斃回子墓之賊百餘
名二十八日張運蘭王文瑞約水師兩路夾擊
陸軍沿河護之破賊卡數重賊黨別出一路直

犯平江三營經各營馳往策應殺賊百餘賊始
奔潰四月二十四日張運蘭王文瑞約會劉于
瀆及水師遊擊任星元等將沿河守卡之賊轟
斃無數內有黃衣賊目五六名二十八日復令
諸營進攻用劈山礮排轟斃賊數十是日劉于
瀆等攻破西瓜洲賊壘江楚兩軍互爲聲援賊
鋒大挫查鎮賊屢敗勢燄已衰各軍打仗亦不

爲不力惟地勢散漫江楚兩岸相距數十里呼
應不靈臣久欲濟師往勦因湖南永寶被擾防
賊回竄故未敢將撫州各營調出致南路過於
空虛目下湖南賊蹤盡趨西路卽派駐撫之各
營兵勇分起拔營助攻景鎮交臣弟曾國荃督
帶與張運蘭劉于瀆等面商進取機宜總期迅
掃逆巢肅清江境

曾國藩又奏言疊准江西撫臣耆齡來函九江道沈葆楨現擬飭赴本任廣信係東路要郡防務不可稍鬆須得威望素著之大員前往接辦擬商調贛南鎮總兵饒廷選赴廣信接防查贛甯一帶賊氛已遠廣信地屬要區自應先其所急卽令該總兵率所部閩省兵勇駐紮廣信其信屬防兵均歸節制俟景德鎮克復信防稍鬆

聞

再行酌量奏入均報

曾國藩又奏言翰林院編修李鴻章前隨呂賢
基辦理安徽團防嗣經福濟奏留軍營襄辦一
切七年九月該員丁父憂服闋福濟奏俟經手
事件料理完竣給咨回京供職欽奉

諭旨 在案該員俟經手事竣前來江西省母後卽欲回

上從之

京臣因該員久歷戎行文武兼資堪以留營襄辦昨因添兵助攻景德鎮已檄李鴻章會同曾國荃等前往督勦奏入

同日勝保奏言自盱眙失守臣督帶各起馬步官軍馳抵蔣壩力加整頓五月二十八日賊股分路撲至狀頭橋直趨蔣壩臣派營總烏勒興

阿等帶領馬步各隊設伏高橋左側以備邀截
是日賊至我兵四路抄擊立將賊陣衝爲數段
逆賊踉蹌敗回我兵追殺十餘里斃賊甚多二
十九日逆匪大股仍屯聚狀頭橋南臣親至三
河口督同道員赫特赫訥等嚴密守禦靜以待
動該逆偵知我兵有備遁去臣思盱眙地當北
竄咽喉關係全營餉道斷不可任令久踞於本

月初一日激勵將士派候選道蔡觀龍會同赫特赫訥等挑選民練網船多隻配以新購洋槍洋礮令同知丁承鈞帶往由老子山龜山一路泝流上駛專在湖面進攻以扼盱眙之背一面派副都統富勒德恩布等帶領馬隊由高橋狀頭橋一路而進總兵張得勝等帶領步隊由觀音寺三河一路而進均定於初二日夜齊偪盱

貽水陸兩路同時進攻使賊應接不暇是夜我陸路各軍銜枚疾馳時近三更直抵盱眙東關分道衝進山口抄出賊前馬隊先登步隊繼後拋擲噴筒火彈由關廂喊殺而入該逆蒼黃無措紛紛驚竄我軍乘勢掩殺斃匪不計其數時水師礮船亦由西北湖邊登岸鼓勇衝入縣中踞賊悉數竄至附近之磨磨山天台山各軍乘

勝槍上山巔隨勦墮進匪衆奪路狂奔又經我
兵追殺無算餘匪盡向古城來安滁州一路竄
逸立將盱眙縣治克復前因盱眙喫緊臣飛飭
調回麟瑞薩薩布馬隊來援麟瑞等行至湖溪
一帶與賊相遇登時接仗亦獲全捷目下盱眙
雖復而天長尙爲賊踞蔣壩地方仍屬喫重臣
現已派隊進紮盱眙前路布置妥協後卽日折

回蔣壩覘賊動靜再定進止惟現當攻勦喫緊
亟須添兵其由天津分撥黑龍江馬隊五百名
日久不見到營頃復由臣專弁飛提催其星速
前進庶得稍厚兵力而資調遣奏入

上諭內閣曰勝保於數日之內督兵克復盱眙尙爲妥
速所有在事出力文武員弁兵勇准其擇尤酌保以
昭激勸

十四日壬子和春奏言自天長賊匪分股回窟六

合後欲由瓜埠河西抄襲我軍糧道以圖大逞
經鞠殿華熊天喜疊次擊勦該逆陸續潛逃張
國樑探得江浦北門外瓜子山一帶添築逆壘
山後王家坳地方逆館尤多雖經屢受創懲而
地當南北咽喉該逆以全力死守五月二十二
日張國樑命諸軍黎明進兵分軍爲三自率參

領德謙等暨馬隊親軍爲各路策應該逆從山
梁擁出悍賊千餘名張國樑派總兵李若珠等
擊其左副將韋明堂等擊其右副將黃靖等擊
其中另以副將陳開選等爲右路接應兼攻五
里墩逆壘以斷賊援左右中三路槍礮連環而
進該逆且拒且逃我軍追上山坳突出伏賊千
餘我軍鼓勇而前斃賊無數張國樑見前驅得

手親督諸軍奪卡而上賊踉蹌入壘山後小店
地方忽又出賊數千抄我後路張國樑一面揮
軍仰攻一面飭李若珠等分帶馬步隊迎擊賊
勢披靡追越山嶺直至王家坳殲賊甚多時總
兵周天培阻水浦口張國樑卽令就近攻勦以
牽賊勢使之不能分竄江浦伏查本年二月以
來逆援麕集江北不下十餘萬南岸官軍徵調

已空萬一該逆再犯江浦潛回金陵乘我之虛
或潛犯太平甯國均不可不豫爲之防因將馮
子材等所部兵勇三千名陸續調回復以兵力
尙單又將熊天喜等所部兵勇四千餘名調回
高淳東壩溧水及金陵各路原營以防衝突至
六合外援已遠必須速擣堅城復自揚防抽調
張玉良兵勇二千名馳赴六合迅圖攻勦前奉

上諭令臣於張玉良熊天喜各軍內酌撥官兵前往勝保軍營會剿天長賊匪天長乃北路要區豈可任賊盤踞惟揚防存兵此時僅五千有奇祇能分守要隘而甫經調回江南之兵若令再趨天長亦覺疲於奔命茲又探得賊首陳玉城李侍賢率黨萬餘分竄東壩等處又聞僞北國宗韋逆現由安徽欲與陳李二賊併力下竄若不先

事豫防儻根本重地稍有動搖實屬不堪設想
惟有再飭安勇張玉良等體察情形如遇北路
有警必當星馳協勦奏入

上諭曰前有嚴諭催調援軍自必遵辦雖盱眙現在收
復北路仍係緊要斷不准稍分界限

十六日
甲寅張芾奏言皖南青陽所屬之崇覺寺

地方居徽甯兩府之中扼逆匪往來之衝要自

周天受督隊駐防地方賴以乂安今蒙

特命督辦甯國軍務自可日有起色所慮者徽防各營

將才以分而見少副將王恩榮扼守婺源已屬

獨當一面副將王夢麟孤注建德尤覺戰守兩

難獨恃署皖南鎮總兵江長貴駐師祁門而白

沙嶺外匪徒未嘗一日稍忘窺伺聞崇覺寺去

一大將必將蹈隙而來江長貴一軍正當兩面

賊衝勢難兼顧 臣與周天受函商查有現駐南陵之總兵米興朝威望謀略遠勝諸將以之接統崇覺寺防務庶足以鎮軍心而卻逆燄奏入報

聞

二十八日

丙寅

和春奏言逆匪屢欲援救金陵經

總兵吳全美派參將郭定猷帶領師船扼截江

心四月二十八日賊黨數千密運大礮布置江岸二十九日復從裕溪口突出礮划十餘隻來撲郭定猷令守備何慶龍等奮力迎勦奪賊礮划數隻斃賊無數五月十五日曹府洲等處陸賊悉出直抵江岸東梁山裕溪口又出賊划五十餘隻上下衝撲岸賊亦槍礮不絕郭定猷率何慶龍等分投截擊戰經兩時之久適蕪湖又

駛出賊划二三十隻前來夾攻官兵勇氣百倍
擊沈賊划四隻我軍正在接仗適下游歐陽忠
師船前來會勦兩面夾擊賊始披靡水陸四散
是役也水師血戰三晝夜擊沈賊划及殲賊不
計其數陣亡水師外委鄭國興奮勇捐軀請

旨飭部從優議卹奏入

上諭內閣曰此次水師與賊接仗至三晝夜之久擊沈

賊划及殲斃賊衆不計其數防勦尙爲出力仍著和春飭令實力堵勦毋任逆賊肆行竄渡陣亡水師外委鄭國興著交部從優議卹

和春又奏言前因浙江提臣鄭魁士文武不協
奉

旨調回金陵帶兵助勦現據皖南江蘇地方官稟稱該提督剛方英勇約束嚴明民情十分愛戴茲聞

遠調所有高瀆東壩一帶居民無不惶駭又准
何桂清函述該提督威望卓然一塵不染非僅
本地方官民悅服卽鄰境亦異口同聲聞其離
防咸深去後之思 臣與該提 臣共事最久其勇
往正派 臣所深知今值逆援大至高瀆東壩等
處爲江浙兩省咽喉提督周天受雖接辦甯防
於瀆壩尙難兼顧應請

旨卽以鄭魁士留防高瀆東壩一帶以固門戶而順民心實於大局有益奏入

上諭內閣曰浙江提督鄭魁士著駐紮高瀆東壩一帶辦理防剿事宜

和春又奏言盱眙現經克復該逆竄往池河欲撲定遠另股圍攻滁州來安勝保擬卽督軍由蔣壩馳赴明光以救定遠囑臣派兵於天長以

南擣賊後路解除來之圍查揚州六合防兵距
天長過遠兵力不能聯屬不若撥兵以益勝保
聽其調遣較爲得力惟是江北兵勇先後調回
七千此時太平一路時有添賊內犯之謠勢難
再行分撥因與張國樑許乃釗悉心商酌惟有
仍在六合抽調兵勇二千名派令安勇統帶馳
赴蔣壩歸勝保驅策臣奉

命兼統北軍自應通籌全局務矢和衷祇以南北兩軍地勢遼闊兵力不敷調用安勇向帶步隊駕馭有方此次賊犯揚城守禦尤得其力當可助皖軍一臂現據安勇稟報已於六月十六日帶兵拔隊起程前赴勝保軍營會同進剿

同日耆齡奏言六月初三四等日劉于瀆率江軍水陸各營與任星元楚軍水師五次進攻附

鎮之裏村西瓜洲回子墓各賊壘殲賊無算張
運蘭等亦率楚軍陸營圍偏鎮市之東十四日
夜間劉于瀆派敢死士潛入鎮內焚其大礮臺
一座並延燒西瓜洲逆壘賊衆驚潰由十八渡
過河望西逃竄任星元卽率戰船截擊劉于瀆
等亦飛調陸隊跟追卽於是夜收復鎮市查景
德鎮逆匪數逾二萬踞險築壘與我軍相持將

聞

及一年始得收復現飭劉于瀆等趕緊跟蹤追
勦務期悉數殲除一面咨會張芾督飭徽防兵
勇實力截擊以杜闖入均奏入報

二十九日丁卯曾國藩奏言六月初五日接奉

上諭因湖南賊衆勢將入蜀飭令帶兵迅赴夔州堵截
查臣部下除蕭啟江之五千人援勦湖南外其

張運蘭之三千七百人已調攻景鎮屈蟠之平
江營千人復調防湖口昨派臣弟曾國荃帶五
千八百人赴鎮協勦臣並未留一卒一兵曾國
荃等抵鎮後移營進逼五月二十六二十八六
月初二等日均獲勝仗以機勢而論可期得手
今若改圖入蜀將楚軍全行撤退則饒防僅劉
于瀆一軍不能扼截東路賊必乘虛內竄北而

彭澤湖口南而撫州建昌均慮難支是未保將
危之四川先棄甫定之江西再四思維實有顧
此失彼之慮若遵

諭旨據兩湖上游之勢則卽臣現在之兵力略加水師

駐紮宜昌等處卽可穩占上游固湖廣之西門
若必徑趨夔州則不以兼顧湖廣爲重而以籌
防全蜀爲重不特蕭啟江一軍必須調集同行

且當添調水師湊齊三萬人乃可攜以入峽白
軍興以來川陝兩省最爲完善久爲逆黨所垂
涎我

皇上睠焉西顧防患未形洵屬刻不可緩之至計惟景
德鎮日下難遽抽動及臣處兵力單弱情形不
得不縷陳於

聖主之前奏八

上命軍機大臣傳諭曾國藩曰前因官文等奏湖南賊勢蔓延意圖窺伺川省當卽諭令曾國藩帶兵由湖北八川防堵茲據該侍郎奏稱楚軍進攻景德鎮正在喫緊難遽抽動擬就現在之兵力駐紮宜昌等處以固湖廣西門等語自係爲熟籌江西湖北兩處大局起見惟昨據耆齡奏景德鎮業經克復江西軍務稍鬆該侍郎應將景德鎮善後事宜妥速辦理酌留

防兵仍遵前旨統帶所部兵勇由楚赴川至蕭啟江
一軍赴援湖南該侍郎兵力較單可至湖北與官文
胡林翼商酌撥兵帶往以壯聲威原摺所稱駐紮宜
昌等處即可穩占上游是但爲鎮守湖北起見尙未
能籌防蜀省曾國藩當熟思大勢應如何定計之處
詳悉馳奏毋得遷延